

3

Das zwelffte Capitel.

nach folget *Venus* / die auch mit regieret wegen oberzelter vrsachen / Ist auß irer eigenschafft / kaldt / feucht / nächtlich / weibisch / des kleinern glücks vnd Phlegmatisch. Darauß dann eine besondere deutung zuschöpffen / welche leichtlich zuerkennen / so man gedachte *proprietates* im gründe ansihet / dauon wir kurze halben nicht mögen weitleufftiger handeln. Außgenom̄en der *Saturnus* alleine / so sind zu dieser ersten erscheinung des Cometen / alle andere Planeten vnter vnserm Horizont gestanden / als in dem fünfften Hause ♃ / ♀ vnd ♂ / im sechsten ☉ / ☾ vnd ♁. Die andern stellen des Himmels sind von den Planeten ganz vnd gar ledig gewesen. Inn dem Wienischen Horizont ist herauff gestiegen der 25. gr. ♄ / vnd im mittel des Himmels der 23½ gr. ♄ durchgangen. Der Comet aber ist wegen seiner *latitudine boreali* fast im mittel des achten Hauses gesehen worden / Von dannen er seinen Barth oder Schwanz durchs ganze Neunde / nachhend zum Meridian im Zehenden / außgedehnet. Vnd als jnen ethliche damals obseruiret / hat er bey 44. gr. vnter dem *Primo mobili* bedeckt. Das Cor ♄ oder *Basiliscus* ist im winkel des vntern Himmels gewesen. Dannher eines theiles die oberzelte signification genom̄en / Vnd was sonst mehr kan heraus verstanden werden / wollen wir den fleissigen *Astronomis* zuerkennen vnd außzulegen heim gestellet haben. Dann einem allein nicht möglich alle verborgene geheimnis / wegen der hoheit dieser Kunst / so dem Menschlichen verstande sehr vberlegen / an Tag zugeben. Darumb wol von nöthen were / das mit beystandt anderer *Astronomorum*, durch eine *generalem collationem* / hievon ein verstendiges vnd einmütiges *Prognosticon* gestellet vnd publicieret würde.

Die ander Figur oder *habitus Comete ad aetheream regionem*, wird von der ☽ *lumin*: oder Neumonden / so kurz vor

N

der crs